



KOMUNIKASHON PA PRENSA

PCN ta lanta kompania di invershon

Kralendijk- Fondo di penshun PCN a lanta awe un kompania pa hasi invershon i pa kompra di bienes lokalmente, o pa ta mas eksakto riba e islanan di Boneiru, St. Eustatius i Saba. Awe mainta firmamentu di e statutan di Participatiemaatschappij Caribisch Nederland B.V. (PMCN) a tuma lugá na ofisina di notario Kenneth Arends.

“Pa motibunan stratégiko nos a disidí di lanta un kompania pa por hasi diferente tipo di invershonnan lokal”, presidente di PCN Harald Linkels, a splika. Pa medio di PMCN nos por kumpra sierto bienes, pero nos lo por asta partisipá ku den sierto kompanianan lokal, si nos ta di opinion ku nos por produsí un ganashi ku esaki. Segun Linkels, PCN ya pa algun tempu ta preparando un maneho pa hasi invershon lokalmente.

“For di dia ku a lanta PCN, tur kapital di e fondo ta wòrdu invertí den eksterior”, asina Linkels ta splika. Segun Linkels, kontrali na e situashon pa fondonan di penshun manera Algemeen Pensioenfonds Curaçao (APC), Algemeen Pensioenfonds van St. Maarten (APS) i Algemeen Pensioenfonds van Aruba (APFA), PCN no tin obligashon pa invertí un parti di su kapital lokalmente. Tòg segun Linkels ta splika, tin sierto motibu pa konsiderá pa invertí un parti di e kapital di e fondo lokalmente.

“Nos ta mira serka nos koleganan riba otro islanan, ku invershonnan lokal debidamente por i ta agregá balor pa e fondo di penshun. Hopi biaha invershonnan lokal no ta move de e mesun direkshon ku esnan internashonal, por ehempel na momento di hopi turbulensia ekonómiko riba merkadonan finansiero mundial”, segun Linkels.

Linkels ta bisa ku PCN su meta ta pa hasi invershonnan lokal ku di un banda ta agregá na e ganashi ku e fondo ta hasi riba su kapital, pero ku e fondo ku invert tambe den kosnan ku ta relevante pa e islanan i nan poblashon. “Si nos por hasi un bon ganashi riba nos kapital, mientras ku nos ta aportá na mes momentu na e desaroyo ekonómiko di nos islanan, nos tin e mihó di dos mundo”, segun e presidenti di PCN.

Linkels a bisa tambe ku e fondo riba termino no muchu largu, lo duna mas informashon tokante e promé proyektonan di invershon lokal. Na tur, e fondo tin planeá pa invertí masomenos 8% di su kapital total den invershonnan lokal. Na tur e kapital di PCN aktualmente ta di masomenos 390 mion dolar merikano.

E fondo ta invertí masomenos 65% di su kapital den invershonan di interes fiho, manera bononan di gobierno. E sobrá 35% di e kapital ta wòrdu invertí den efektonan di kompanian privá. Den 2017, PCN a logra un rendimentu riba su kapital di mas ku 13%, loke por konsiderá hopi haltu.

Riba e potret:

Presidente di PCN Harald Linkels huntu ku vise presidente Valdemar Marcha a firma pa e lantamentu di Participatiemaatschappij Caribisch Nederland B.V. serka ofisna di notario Kenneth Arends awe tardi, 12 di mart, 2018.